

# Events dai 25 di Setembar ai 5 di Otubar ZORNADIS EUROPEANIS DES LENGHIS: IL FRIÛL PROTAGONIST

**Bibliotechis virtuâls, cartons animâts, concerti,  
teatri par furlan e istituzions, *marilenghe* e artesans, incuintris  
cui students, contis e rimis pai fruts**

Promovi l'aprendiment des lenghis e la diviersitât lenghistiche. Al è chest il fin de setime edizion des "Zornadis europeanis des lenghis" che si davuelzaran a Udin di martars ai 25 di Setembar a sabide ai 5 di Otubar, inmaneadis dal Centri interdipartimentâl di ricercje su la culture e la lenghe dal Friûl (Cirf) de Universitât dal Friûl, Regjon Friûl Vignesie Julie, Agenzie regionâl pe lenghe furlane (Arlef), Provincie e Comun di Udin, Societât Filologjiche Furlane. Dal 2001, ogni an, ai 26 di Setembar il Consei di Europe al celebre la zornade europeane des lenghis. «Il Friûl – e spiege la direttore dal Cirf, Piera Rizzolatti – al è l'unic setôr teritoriâl european li che o cjatin insiemit lis trê principâls fameis linguisticis continentâls: il romanç, il slâf e il gjermanic. Par chest il Friûl al à dutis lis carateristichis domandadis par jessi un vêr laboratori di incuintri e confront sul teme de identitât linguistiche».

**La inaugurazion des Zornadis europeanis des lenghis si davuelzarà martars ai 25 di Setembar, aes 10, inte sale des cunvignis di Palaç Antonini, in vie Petracco 8, a Udin.** E je previodude la presince, tra lis tantis, dal retôr Furio Honsell; dal assessôr regionâl ae [Istruzion, culture, sport e pâs](#) Roberto Antonaz; dal president de Provincie di Udin Marzio Strassoldo; dal sindic di Udin Sergio Ceccotti; dal president de Agenzie regionâl pe lenghe furlane, Lorenzo Fabbro; dal president de Societât Filologjiche Furlane Lorenzo Pelizzo.

Il program de manifestazion al è vivarôs e plen di propuestis in diviers setôrs. Cuatri i events che si davuelzaran **miercus ai 26 di Setembar. Aes 11, a Palaç Mantica, in vie Manin 18,** e sarà firmade une convenzion tra Confartigianato Udine e Societât Filologjiche Furlane pe promozion de lenghe furlane intal compart artisan e des impresis piçulis e mediis. **Aes 15, li de Biblioteche civiche "Joppi",** in place Marconi 8, in colaborazion cu la Societât Filologjiche Furlane, proiezion dal carton animât "Omenuts". **Des 17 aes 18, li de Sezion pai fruts de Biblioteche "Vincenzo Joppi",** "Cjase mê, contis di lûcs, tradizions e int furlane": filastrocjis, ninenanis, induvinei ançe par furlan pai fruts di cinc a vot agns. **Aes 20.30, li dal teatri comunâl di Cormòns,** concerti "babelic" cun Lino Straulino, Maurizio Mattiuzza, Fabian Riz, Pantan e Kosovni Otpadki par cure de Provincie di Gurize, cu la colaborazion de Regjon e dai Comuns di Cormòns e Udin.

Doi i apontaments par joibe ai **4 di Otubar. Aes 11.30,** li de Biblioteche civiche "Vincenzo Joppi" presentazion dal progjet "Biblioteca virtuale/Biblioteche virtuâl" par cure de Agenzie regionâl pe lenghe furlane, de Biblioteche civiche "Joppi", de Societât Filologjiche Furlane e de Associazion taliane bibliotechis. A saran presints Romano Vecchiet, Piergiorgio Sclipa, Antonella Passone e Donato Toffoli. **Aes 16.30 a Palaç Belgrado, in place Patriarcato 1,** cunvigne cu la intitule "Un teatri stabil pe marilenghe: istituzions e operadôrs teatrâi a confront"; intervencions di Alberto Bevilacqua, Claudio De Maglio, Angela Felice, Renzo Lavia, Renato Manzoni e Michele Mirabella.

Par concludi, **vinars ai 5 di Otubar aes 10, intal auditorium Zanon, in vie Leonardo da Vinci 2,** incuintri cui arlêfs des scuêlis superiôrs e dal ateneu "Per le strade d'Europa" inmaneât dal Centri interdipartimentâl di ricercje su la culture e la lenghe dal Friûl (Cirf) de Universitât dal Friûl. A cjapan part docents e ricercjadôrs dal ateneu e esperts di minorancis lenghistiche.